

Pemalsuan faktor utama 13/1/88 krisis Datuk Kelana

SEREMBAN, Selasa — Isu pemalsuan Terombo Asal Luak Sungai Ujong yang ditimbulkan oleh anak-anak Waris Perut Ulu daripada Rumpun Tinggang adalah di antara faktor utama yang menyebabkan krisis perantikan Datuk Kelana (Undang Luak Sungai Ujong) ke-10 berlarutan lebih empat tahun.

Sumber tertinggi adat berkata anak-anak Waris itu sudah pun mempersembahkan satu memorandum mengenai pemalsuan Terombo itu kepada Yang Dipertuan Besar selaku Pengerusi Dewan Keadilan dan Undang Negeri Sembilan baru-baru ini.

"Anak-anak Waris Rumpun Tinggang mendakwa bahawa Terombo Asal Luak Sungai

Oleh BUSTAMAM AHMAD

Ujong dipalsukan oleh sekumpulan anak-anak Waris Perut Ulu sewaktu pemerintahan Undang kelapan, Allahyarham Datuk Kelana Makmur Datuk Menteri Kassim pada 1940.

"Terombo Asal ini kemudian digantikan dengan Jural Tela-ga Undang, yang kini dipertahankan oleh sekumpulan anak-anak Waris Perut Ulu untuk dijadikan asas dalam pemilihan Datuk Kelana ke-10.

"Dewan kini dipercayai sedang menyiasat dakwaan itu dan ini adalah di antara faktor utama yang menyebabkan krisis perantikan Datuk Kelana ke-10 berlanjutan lebih empat

tahun sekarang," kata sumber tertinggi adat kepada *Berita Harian* hari ini.

Difahamkan pemalsuan Terombo Asal Luak Sungai Ujong sekaligus menjadikan satu Rumpun anak Waris Perut Ulu sebagai 'anak Waris mutlak' untuk menyandang pesaka Datuk Kelana.

Ia juga menyebabkan sekurang-kurangnya dua lagi Rumpun anak Waris Perut Ulu dikenali sebagai Waris Lingkungan yang mengikut aturan adat dan pesaka Luak Sungai Ujong tidak layak menyandang pesaka Undang.

Sumber itu menjelaskan tidak wujud istilah 'Waris Lingkungan' di kalangan anak-anak Waris Perut Ulu berdasarkan isi kandungan Terombo Asal Luak itu.